



**Aatsitassanut Inaatsisip allangortinneqarnissaanut siunnersuummik UKA2022-mi saqqummiussinissamik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut, taamaalilluni inatsimmi § 1, imm. 2 ima oqaasertalernerqassalluni. "Ingerlatanik inatsimmut ilaasunik suliarinninnermi isumannaallisaaneq, peqqissuseq, avatangiisit, pisuussutunik atorluaaneq kiisalu inuiaqatigiinnut akornutaanngitsumik ingerlatat suliarineqarnissaat kiisalu pissutsini assigiinngitsuni nunat tamat pitsaanerpaamik ileqqorissaartarnerat akuerisaasut qulakkeerneqarnissaat Inatsisartut inatsisaatigut anguniarneqarpoq". § 83-mi oqaasertaliusaaq "nunat tamat ileqqorisartagaat pitsaasut" aamma "nunat tamat pitsaanerpaamik ileqqorisartagaat, Kalaallit Nunaanni pissutsinut naleqqussagaq" mut aamma allangortinneqassaaq. Taamattaaq misissueqqaarnissamut qinnuteqaatinik paasisutissanik Naalakkersuisut tamanut saqqummiussisalernissaannik inatsimmi aalajangersagaliisoqassaaq, taamaaliornikkut piffinni innuttaasut soqutigisaqartullu allat, ilisimasaqalersinnaaqqullugit.**

(Inatsisartunut ilaasortaq Mariane Paviassen, Inuit Ataqtigiit)

(Siullermeerneqarnera)

Iluaqutaanngilaq nunatta ineriartorneranut naalleraajuassagutta. Siunnersuutip uuma siunertaraa ajornakusoornersitsineq – ajornarnarluinnartitsissanngippat – maani nunatsinni aatsitassanik piiaanisaaq, tamannalu pitsaanngilaq inuiaqatigiit ineriartornerannut.

Nikalluallannarpoq isiginnittuulluni, qanoq Inuit Ataqtigiit nunatta siunissami isertitassaraluannut akerlilersuijuarnerat. Eqqaasitsissutigilaarlakka piviusut ersarilluinnartut uku:

Inuunerissaarneq siuarsassagaanni, nunatta karsia aningaasanik amerlanernik pisariaqartitsivoq.

Akilerarutit akitsuutillu apparusunneqarpata, nunatta karsia aningaasanik amerlanernik pisariaqartitsivoq.

Naalakkersuinikkut namminiilerusukkutta, nunatta karsia aningaasanik amerlanernik pisariaqartitsivoq.

Una siunnersuut akuerineqassappat, aatsitassarsiornermi ineriartorneq unitsissavarput maani Inatsisartuni inatsisip allangortinneqavinnissaata tikitserlugu. Aningaasaliinissamut kissaateqartoqarnaviannngilaq, inatsimmik akimmisaarinerusumut allanguisoqalernera toqqammavigalugu.

Taamatut oqareerlunga, nassuerutigisariaqarpara, ilumoorlunga paasisinnaannginnakku, siunnersuuteqartup suna angorusunneraa.

Assersuutitut siunnersuuteqartut kissaatigaa, "nunat tamat ileqqorisartagaat pitsaasut" allangortinneqassasut imaalillugu "nunat tamat pitsaanerpaamik ileqqorisartagaat, Kalaallit nunaanni pissutsinut naleqqussagaq". Taavami nunat tamat pitsaanerpaamik ileqqorisartagaat nunatsinni pissutsinut tulluutinngippata?



Tassani allamik malitassamik toqqaasariaqassaagut, tulluutissaarlu “nunat tamat ileqqorissartagaat pitsaasut” toqqaraanni. Aamma kia nakkutigissavaa aaliangerlugulu, ileqqorisartakkat arlaat, Kalaallit Nunaannut pitsaanerpaanersoq?

Pisarissersuisariaqanngilagut pissutsinut pisarioreersunut.

Siunnersuuteqartup aamma kissaatigaa, oqaaseq “anguniarpaa” allanngortinneqassasoq imaalillugu “imaassaaq”.

Ilumoortumik; arlaannaataluunniit siumut qulakkeersinnaanngilaa, suliaq 100 procentimik kissaatigineqartutut, naammassineqarsinnaasoq. Anguniarneqarsinnaavoq, kisiannili qulakkeerneqarsinnaanngilaq. Taamaattumik allannguinerup kingunereriaannaavaa, nunarsuarmi kialluunniit Aatsitassanut Inatsimmik malinnissinnaannginnera, tamannalu oqaannaraanni tassaalluni, maani nunatsinni aatsitassarsiornissaq piumanngilluinnaripput. Immaqamiuna Inuit Ataqtigiit tamanna kissaatigigaat?

Siunnersuut taanna nunatta ineriartorneranut ajoqutaassaaq, taamaattumillu Demokraatit itigartinneqarnissaa innersuussutigaa.